

27 APR 1999

MAHATHIR UCAP TAHNIAH KEPADA MANDELA

KUALA LUMPUR, 27 April (Bernama) -- Malaysia akan terus meninjau cara-cara untuk memperluaskan bidang kerjasama dengan Afrika Selatan yang akan menguntungkan rakyat kedua-dua buah negara pada alaf akan datang, kata Perdana Menteri Datuk Seri Dr Mahathir Mohamad.

Hubungan erat di antara Malaysia dan Afrika Selatan dan kerjasama di antara rakyat kedua-dua buah negara telah memberi manfaat terutama di dalam bidang perdagangan dan ekonomi, katanya.

"Malaysia menghargai hubungannya dengan Republik Afrika Selatan. Saya yakin bahawa Afrika Selatan akan terus makmur dan membangun pada tahun-tahun akan datang yang sudah tentu menguntungkan rakyat negara itu," katanya dalam perutusan tahniah kepada Presiden Nelson Mandela bersempena hari kebangsaan Afrika Selatan hari ini.

Dalam perutusan yang sama kepada rakan sejawatannya dari Afrika Selatan Alfred Nzo, Menteri Luar Datuk Seri Syed Hamid Albar melahirkan harapan agar hubungan dua hala yang erat yang dinikmati kedua-dua buah negara akan diperkukuhkan di tahun-tahun akan datang.

-- BERNAMA

AR AKD